

家

藏

蒙

筌

三

家藏蒙筌卷二

後學王世鍾小溪氏纂輯男進哲八瑞校訂

訂正仲景傷寒六經上

嘗思醫之有仲景猶儒之有孔聖也所著傷寒一書爲醫家指南亦猶之論語爲學者準繩也歷來各賢無一不以此書爲根柢奈今醫學陵夷而仲景之心法久已廢弛故以學者罔識六經學無根底不得真詮勿惑乎誤人也卽有欲精其術者不得其門而入鍾因將仲景傷寒六經挹諸家解釋之精義摘錄其要普渡羣迷俾後學知有所宗庶醫學歸於正道也蓋天下醫書雖多總推此書爲第一凡欲精通醫學者必先以此書熟讀

玩味然後博觀羣書則本實枝茂醫學昌明自可壽世矣鍾非
敢曰醫學一道胸有特見然忝酌權宜或亦鉛刀之一割也乎

太陽病

陽明病

下卷

少陽病

太陰病

少陰病

厥陰病

家藏蒙筌卷二 中

後學王世鍾小溪氏纂輯男油哲久瑞校訂

太陽病

足太陽之爲病脈浮頭項強痛而惡寒若發熱汗出惡風脈緩者名爲中風人之皮毛內合於肺皮毛不固風邪侵肺則氣壅鼻鳴風邪干氣則氣上逆而爲乾嘔皆宜桂枝湯主之此方爲仲景羣方之冠乃解肌發汗調和營衛之第一方也凡中風傷寒脈浮弱汗自出而表不解者皆得而主之粗工妄謂桂枝湯專治中風不治傷寒又謂專走肌表不治他病不知此湯倍芍

藥生薑加人參名桂枝新加湯用以治榮表虛寒肢體疼痛倍
芍藥加飴糖名小建中湯以治裏虛心悸腹中急痛再加黃芪
名黃芪建中湯用以治虛損虛熱自汗盜汗

桂枝湯

桂枝 五錢 芍藥 五錢 生薑 五錢 紅棗 五枚 炙甘草 四錢

桂枝心加湯 即桂枝湯內倍芍藥生薑加人參是也治榮表虛寒肢體疼痛

小建中湯 即桂枝湯內倍芍藥加飴糖是也治裏虛心悸腹中急痛

黃芪建中湯 即小建中湯內加黃芪是也治虛損虛熱自汗盜汗

○初病發熱惡寒者謂之中風之病發於衛陽也初病不發熱惡寒者謂之傷寒之病發於營陰也發於陽者七日愈發於

陰者六日愈以陽合七數陰合六數也

○夫桂枝湯爲解肌中風表虛之藥也若其人脈浮緊發熱汗不出者乃寒傷表實之病不可與也常須識此爲麻黃湯證勿令誤與桂枝湯也

太陽病發汗遂漏不止其人惡風小便難四肢微急難以屈伸者桂枝加附子湯主之

程知曰此陽氣與陰液兩亡復加外風襲入與真武證脈微細有別真武湯是救裏寒亡陽之失急於回陽者桂枝加附子湯是救表寒漏風之失急於溫經者

桂枝加附子湯

卽桂枝湯內加附子是也

柯琴曰是方以附子加桂枝湯中大補表陽也表陽密則漏汗自止惡風自罷矣汗止津回則小便自利四肢自柔矣汗漏不止與大汗出同而從化變病則異服桂枝麻黃湯大汗出後而大煩渴是陽陷於裏急當救陰故用白虎加人參湯服桂枝麻黃湯發汗遂漏不止而不煩渴是亡陽於外急當救陽故用桂枝加附子湯要之發汗之劑用桂枝不當則陽陷於裏者多用麻黃不當則陽亡於外者多因桂枝湯有芍藥而無麻黃故雖汗大出而元府尙能自閉多不致亡陽於外耳服桂枝湯大汗出後大煩渴不解脈洪大者白虎加人參湯主之大煩渴陽明證也洪大陽明脈也中風之邪服桂枝湯大洋

出後不解大煩渴脈洪大者是邪已入陽明津液爲大汗所傷胃中乾燥故也宜與白虎加人參湯清熱生津而煩除矣

石膏

五錢

知母

三錢

粳米

一合

人參

二錢

炙甘草

二錢

太陽病三日發汗不解蒸蒸發熱者屬胃也調胃承氣湯主之
太陽病三日發汗後熱不解若仍陣陣發熱有汗而不解者
是太陽表證未罷也則當以桂枝湯和之今蒸蒸發熱有汗
而連綿不解者則知其熱自內騰外非表邪不解乃太陽之
邪轉屬於胃病熱不能解也

調胃承氣湯

大黃

四錢酒浸

炙甘草二錢

芒硝三錢

太陽病發汗後大汗出胃中乾煩躁不得眠欲得飲水者少少與飲之令胃氣和則愈若脈浮小便不利微熱消渴者五苓散張兼善曰白虎治表證已解邪傳裏而煩渴者今脈浮身有微熱而渴乃表邪未得全解故用五苓藉桂枝之辛散和肌表以解微熱也尤澤二苓之淡滲化水生津以止煩渴也喻昌曰脈浮當用桂枝何以變用五苓耶蓋熱邪得水雖不全解勢必衰其大半所以熱微兼小便不利證成消渴則蓄飲證具故不從單解而從兩解也凡飲水多而小便少謂之消渴裏熱飲盛不可單用桂枝解肌故兼以利水惟

五苓有全功耳

中風發熱六七日不解而煩有表裏證渴欲飲水水入則吐者
名曰水逆五苓散主之

五苓散

猪苓

五錢

茯苓

五錢

白朮

五錢

澤瀉

一兩

桂枝

二錢

去皮

共爲末每服三錢熱湯下

是方也乃太陽邪熱入腑水氣不化膀胱表裏藥也一治水
逆水入則吐一治消渴水入則消夫膀胱者津液之腑氣化
則能出矣邪熱入之與水合化爲病若水盛於熱則水壅不
化而蓄於上故水入則吐乃膀胱之氣化不行致小便不行
也若熱盛於水則水爲熱灼而耗於上故水入則消乃膀胱

之津液告竭致小便不出也二證皆小便不利故均得而主之若小便自利者不可用恐重傷津液以其屬陽明之裏故不可用也由此可知五苓散非治水熱之專劑乃治水熱小便不利之主方也君澤瀉之鹹寒鹹走水腑寒勝熱邪佐二苓之淡滲通調水道下輸膀胱則水熱並瀉也用白朮之燥濕健脾助土爲之隄防以制水也用桂之辛溫宣通陽氣蒸化三焦以行水也澤瀉得二苓下降利水之功倍則小便利而水不蓄矣白朮藉桂上升通陽之效捷則氣騰津化渴自止也若發熱不解宜用桂枝勿用肉桂服後多服煖水令汗出愈是知此方不止治停水小便不利之裏而猶解停水發

熱之表也加人參名春澤湯其意專在助氣化以生津加茵陳名茵陳五苓散治濕熱發黃表裏不實小便不利者無不効也仲景用五苓散多服煖水令汗出愈其意在利水發汗故知必有無汗小便不利之證也

發汗後不可更行桂枝湯汗出而喘無大熱者可與麻黃杏仁甘草石膏湯

太陽病下之後微喘者表未解也當以桂枝加厚朴杏仁湯解太陽肌表而治其喘也太陽病桂枝證醫反下之下利脈促汗出而喘表未解者當以葛根黃連黃芩湯解陽明之肌熱而治其喘也今太陽病發汗後汗出而喘身無大熱而不

惡寒者知邪已不在太陽之表且汗出而不惡熱知邪亦不在陽明之裏其所以汗出而喘既無大熱又不惡寒是邪獨在太陰肺經故不可更行桂枝湯可與麻黃杏仁甘草石膏湯發散肺邪而汗喘自止矣

麻黃杏仁甘草石膏湯

麻黃四錢 炙甘草二錢 石膏四錢 搗杏仁三錢 去皮尖搗

太陽中風不利嘔逆表解者乃可攻之其人漿漿汗出發熱有時頭痛心下痞鞭滿引脇下痛乾嘔短氣汗出不惡寒者此表解裏未和也十棗湯主之其大便秘不利痞鞭滿痛屬裏病小便不利嘔逆短氣屬飲病故可攻也若無熱汗出乃少陰陰邪寒

飲真武湯證也

按傷寒表未解水停心下嘔逆者是寒束於外水氣不得宣越也宜小青龍湯汗而散之中風表未解水停心下而吐者是飲格於中水氣不得輸洩也宜五苓散散而利之此皆表未解不可攻裏之飲證也至如十棗湯與後之桂枝去芍藥加白朮茯苓湯二方皆治飲家有表裏證者十棗湯治頭痛發熱汗出不惡寒之表已解而有痞鞭滿痛之裏未和故專主攻裏也桂枝去芍藥加白朮茯苓湯治頭痛發熱無汗之表未解而兼有心下滿微痛之裏不和故不主攻裏當

先解表也

十棗湯

羌花

甘遂

大戟

大棗十枚擘

右三味等分爲末以水棗十枚煎湯調服強者服一錢羸者服半錢平旦溫服但此湯峻險不宜輕用服之快利後宜糜粥自養使穀氣內充

太陽病外證未除而數下之遂協熱而利利下不止心下痞鞭表裏不解者桂枝人湯主之

外證未除謂太陽病未除而數下之是下非一次也裏因數下而虛遂協表熱而利利下不止裏虛不固也心下痞鞭裏虛而邪結也外證既未除是表不解也故用桂枝以解表利下痞鞭裏因下虛而從寒化也其脈必微弱故用參朮薑草

以溫裏此溫補中兩解表裏法也若其脈有力者又當從甘
草瀉心湯之法矣

程知曰表證誤下下利不止喘而汗出者治以葛根芩連心
下痞鞭者治以桂枝參朮一救其表邪入裏之實熱一救其
表邪入裏之虛寒皆表裏兩解法也

桂枝人參湯

卽理中湯加桂枝

桂枝

四錢

炙甘草

白朮

人參

乾薑

炒黃各三錢

太陽病桂枝證醫反下之利遂不止脈促者表未解也喘而汗
出者葛根黃芩黃連湯主之

此承上條又言協熱利之脈促者以別其法也太陽病桂枝

證宜以桂枝解肌而醫反下之利遂不止者是誤下遂協表
熱陷入而利不止也若表未解而脈緩無力卽有下利而喘
之裏證法當從桂枝人參湯以治利或從桂枝加杏仁厚朴
湯以治喘矣今下利不止脈促有力汗出而喘表雖未解而
不惡寒是熱已陷陽明卽有桂枝之表亦當從葛根黃芩黃
連湯主治也方中倍用葛根爲君黃連甘草爲之佐其意專
解明陽之肌表兼清胃中之裏熱此清解中兼解表裏法也
若脈沉遲或微弱則爲裏寒且虛又當用理中湯加桂枝矣
按協熱利以脈之陰陽分虛實主治固當矣然不可不辨其
下利之黏穢膿瀉小便或白或赤脈之有力無力也